



## Čas kad sam počela ...

Prvi čas u OŠ „Edhem Mulabdić“ kod mentorice Asife Uzunović pokazao mi je koliko su dobri mentori važni za učenje, inspiraciju i rad s djecom.

Davne 2003. godine zakoračila sam u učionicu OŠ „Edhem Mulabdić“ u Zenici i tada sam, i ne sluteći, započela svoje prvo pravo iskustvo u profesiji učitelja. Moja mentorica bila je Asifa Uzunović, učiteljica čiji je život bio posvećen djeci i radu s njima. Od samog ulaska u tu učionicu osjetila sam posebnu energiju, mjesto gdje se znanje, ljubav i kreativnost stapaju u jedno, gdje je svaki učenik važan, a svaka ideja vrijedna pažnje.

U toj učionici bile su najbolje generacije, a ja sam imala privilegiju da uz mentoricu koja je u meni budila ono najbolje, učim kako da i sama postanem učiteljica koja će djeci pružiti više od same nastave. Tamo sam prvi put čula za Centar Step by Step, metodiku koja dijete stavlja u središte procesa učenja, koja nas uči kako da pratimo njihove potrebe, njihove emocije i njihov razvoj i kako da im pomognemo da rastu u kreativne, vrijedne i radosne osobe.

Posebno se sjećam gospođe Rade, koja je dolazila u našu učionicu da nas vodi i usmjerava. Njene smjernice o primjeni metodike usmjerene na dijete, centri za likovno, čitanje, istraživanje i drugi centri, sve je to činilo da učionica postaje prostor gdje učenje nije samo zadatak, nego iskustvo i igra. Svaki čas bio je prilika da se naučim nečemu novom, da posmatram i upijam znanje mentorice, da shvatim koliko je strpljenja, pažnje i ljubavi potrebno da bi se dijete osjećalo sigurno i motivisano.

Iako sam ranije, tokom srednje škole i fakulteta, imala priliku obavljati praksu u raznim školama, nijedan čas nije mi ostao u sjećanju onako kao prvi čas iz matematike koji sam održala u učionici učiteljice Asife. Tamo sam naučila mnogo više od predavanja samih nastavnih sadržaja, naučila sam kako biti učitelj koji vodi djecu, koji ih razumije, koji ih motiviše i pomaže im da rastu. Tu sam shvatila koliko je važno imati dobre mentore, koji nas vode, podržavaju i inspirišu da damo najbolje od sebe.

Taj prvi čas je bio više od nastave, bio je iskustvo koje mi je pokazalo da je obrazovanje proces pun ljubavi, strpljenja i kreativnosti. Shvatila sam da prava vrijednost učitelja leži u sposobnosti da inspiriše, ohrabri i oblikuje mlade umove, ali i u tome da nikada ne prestajem učiti sama.

Zahvaljujući mentorici Asifi, prvi čas je postao temelj mog profesionalnog puta i sjećanje koje ću zauvijek nositi u srcu.

## Collections

Autorski tekstovi

Objava

Čas kad sam počeo\_la